

DOMENIE XXX «VIE PAL AN»

Jutoris pe Liturgjie

Domenie, ai 27 di otubar dal 2019

Il vanzeli di vuê nus esibîs la preiere di doi oms tal templi di Gjerusalem: un al jere fariseo e chel altri publican. Culî no nus interesse la lôr vite private, ancje se o savìn che il fariseo al jere une anime pie, plui che religjose, colme di oparis buinis e di merits intant che il publican nol olsave nancje a alçâ i vôi, sprofondât tai siei pecjâts. Il prin te preiere al jere un continui elogio di se stes; in lui al valeve il cjaveç che plui o met in pratiche lis leçs dal templi e plui mi sint a puest, justificât; il secont si presentave nût e crût al Signôr e nancje si insumiave une tâl finece; par lui la vite e jere lade a slas.

Fermînsi un moment par domandâsi in ce misure che noaltris si cjatìn dentri ta chel fariseo e ta chel publican. Nus vignarà alore dal cûr une tierce preiere, parcè che la vite no je dome blanc e neri, ma come i colôrs che, seont i sienziâts, a son plui o mancun un milion.

La nestre e je la tierce preiere, la plui vere: di fat, no aparten nancje a la parabule, ma a la sinceritât de mê persone e de vite.

Antifone di jentrade

Sal 104,3-4

Che il cûr si indalegri di ducj chei ch'a van cirint il Signôr.
Cirît il Signôr e la sô potence;
cirît di un continui la sô muse.

Colete

Diu onipotent e eterni,
fasinus cressi la fede, la sperance e la caritât,
e, par podê vê ce che tu imprometis,
fasinus volê ben a ce che tu nus comandis.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Sir 35,12-14.16-18

La preiere dal umil e travane i nûi.

Cheste leture e je une curnîs adate e bieles al vanzeli di vuê e a chês peraulis al tornà cjase justificât. Tignìn presint che Diu al scolte lis preieris cuant e cemût che lui al sa. Cussì lui al esaudì lis suplichis cun grancj berlis e lagrimis di Gjesù dopo de muart in crôs tal colm de resurezion; ancje se il Misericordiôs simpri nus compagne cun cualchi olme de sô presince, amôr e providence.

Cheste leture e pues metinus fûr di strade, se o concludìn che pal puar, vuarfin e vedue Diu al è pront a fâ rispietâ il dirit dai juscj. O vin di tignî presint che chest no nus delibere des grandis nestris responsabilitâts: o jeri malât e no vês stât a cjatâmi... Lait maladets... (cf. Mt 25, 31-46).

Dal libri dal Fi di Sirac

Il Signôr al è un judiç di chei vêrs,
che no si lasse inceâ de aparince.
Nol fâs plasês a spesis dal puar,
ma al scolte la sô preiere s'al è maltratât.
Nol reste sort a la preiere dal vuarfin
e de vedue che si sfoghe vaint.

Chel ch'al siervis Diu come ch'al vûl lui, al sarà ben viodût,
la sô preiere e rivarà fintremai ai nûi.
La preiere dal umil e travane i nûi:
fin che no rive, lui no si da pàs,
fin che l'Altissim nol met man jê no si ferme,
par ricognossi e par fâ rispjetâ il dirit dai juscj.
Peraule di Diu.

SALM RESPONSORIÂL

dal Salm 33

Ducj i sants e i puars a contin des consolazions dal Signôr e a àn fiducie che se l'Altissim no ju scolte in cheste vite, ju esaudissarà dopo muarts. In Diu, al diseve S. Francesc: "Tanto è il bene che mi aspetto, che ogni pena mi è diletto". Parcè che:

R. Al rive denant de tô muse, Signôr, il berli dal puar.

Se cjantât: Il cjant dai salms responsoriâi, p. 256.

O vuei benedî il Signôr cence polse,
la sô laut simpri su la mê bocje.
La mê vite tal Signôr si glorie,
che lu sepin i puars e s'indalegrin. **R.**

Il Signôr al ten di voli chei ch'a fasin robatis,
par scancelâ ancje il lôr ricuart di cheste tiere.
I juscj a an berlât e il Signôr ju à sintûts
e ju à deliberâts di ogni berdei. **R.**

Se un al à il cûr displasint il Signôr i sta dongje,
se al à il cûr pintût lu salve.
Il trist al è fat fûr de sô tristerie;
chei ch'a odein il just a an di purgâlis. **R.**

SECONDE LETURE

2 Tm 4,6-8.16-18

E je za pronte par me la zoe de justizie.

Ancje pal Apuestul la vite e je passade e al sta rivant il tiermin parcè che: La mê vite no je plui che une soflade (Jop 7, 7). Pauli al fâs memorie cun sinceritât di ce che al à vivût, al acete il moment des umiliazions, la prevision dal martiri e al pon la sô sperance tal Signôr al di là de muart.

Un testament spirituâl uman e semplic di une persone che, bandonantsi cun fiducie tal Signôr, e sa acetâ la realtât plui dificile: il limit e misteri de vite.

De seconde letare di san Pauli apuestul a Timoteo

Benedet, par chel che mi rivuarde, jo o soi za spandût in libagjon e al è rivât il moment di molâ lis velis. O ai combatude la buine batae, o ai finide la corse, o ai mantignude la fede. Pal rest e je za pronte par me la zoe de justizie, che in chê di me consegnarà il Signôr, lui ch'al è un judiç just; e no dome a mi, ma ancje a ducj chei ch'a an spietade cun dut il cûr la sô vignude.

Inte mê prime difese, no ai vût dongje di me anime vive. Mi an implantât dal prin al ultin. Che no ur sedi metût in cont di colpe. Il Signôr però mi à judât e mi à dade fuarce par che midiant di me la predicazion dal vanzeli e rivàs insomp e ducj i paians le scoltassin: e cussì o soi stât liberât de bocje dal leon. Il Signôr mi liberarà ancjemò di ogni opare triste e mi salvarà menantmi tal so ream dal cîl. A lui la glorie tai secui dai secui. Amen.

Peraule di Diu.

CJANT AL VANZELI

cf. Mt 11,25

R. Aleluia, aleluia.

Benedet sêstu tu, Pari,
Signôr dal cîl e de tiere,
parcè che ai piçui tu âs palesât
i misteris dal ream dai cîi.

R. Aleluia.

VANZELI

Lc 18,9-14

Il publican al tornà a cjase justificât, il fariseo invezit no.

Semplificant, si podarès ancje viodi tal fariseo e tal publican la imagine di dôs glesiis, une che e dipent de istituzion, dal templi, de sacralitât, de leç, des oparis, che si sint in mission fra i pecjadôrs e dute cjapade di sé; chê altre dal publican, invezit, e je inviscjade tai gredeis complicâts des miseris de vite.

Tal mieç al è simpri Gjesù: i fariseos a disevin: Cemût mai che al mangje insiemei cui publicans e cui pecjadôrs? (Mc 2, 16).

La sostanza des dôs preieris e reste intate ancje se a mudin lis peraulis.

La sielte di Gjesù e je evidente in tancj fats dal vanzeli (par esempi: cf.: La clamade di Matieu, Mt 9, 9-13; l'om cu la man paralisade, Mc 3, 1-6; l'incuintri cu la pecjadorie, Lc 7, 36-50; l'om nassût vuarp, Zn 9, 1-41;...)

Il risultât si lu viôt te pratiche: l'ultim verset di vuê dome al conferme.

Dal vanzeli seont Luche

In chê volte, Gjesù al disè un'altra parabule par un pôcs di lôr ch'a jerin convints di jessi juscj e a spreseavin chei altris: «Doi oms a lerin sù tal templi a preâ: un al jere fariseo e chel altri publican. Il fariseo al stave in pîts e al preave cussi: Diu, ti ai agrât parcè che no soi come chei altris oms, laris, triscj, sporcacions, e nancje come chest publican culi. Jo o zuni dôs voltis par setemane e o ufrîs la decime di dut ce ch'ò ai. Il publican invezit si fermà lontan e nol olsave nancje a alçâ i vôi viers dal cîl, ma si bateve il pet e al diseve: Diu, ve remission di me, pecjadôr. Us dîs che chest culi al tornà a cjase justificât, chel altri invezit no, parcè che chel che si alce al vignarà umiliât e chel che si umilie al vignarà alçât».

Peraule dal Signôr.

Su lis ufiertis

Cjale di bon voli, Signôr,
i regâi ch'ò presentin a la tô maiestât,
par che l'ufierte dai tiei servidôrs
e ledi sù viers de tô glorie.
Par Crist nestri Signôr.

Antifone a la comunion

cf. Sal 19,6

Si indalegrarìn de tô vitorie
e o gjoldarìn tal non dal nestri Diu.

Daspò de comunion

I tiei sacraments, Signôr,
ch'a operin in nô ce ch'a significhin,
par ch'ò podìn gjoldi te plenece de veretât
ce che cumò o fasìn in maniere velade.
Par Crist nestri Signôr.

Par Crist nestri Signôr.

* * *

Cjants

Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Una preghiera atea

La preghiera del fariseo è una preghiera sterile perché dietro l'apparente devozione e pietà essa è sostanzialmente "atea". Dio fa da scenario all'elogio che il fariseo fa di sé. Egli strumentalizza il rapporto religioso per la propria esaltazione. Non si aspetta nulla da Dio e non ha nulla da chiedere. Egli fa sfoggio di sé e dei suoi diritti e vanta il suo credito nei confronti di Dio.

L'altra faccia di questa deformazione religiosa è il disprezzo degli altri. Il fariseo ha bisogno di contrapporsi a quelli che considera peccatori per confermare e dare spessore alla sua esaltazione.

Mons. Rinaldo Fabris

* * *

Miercus: la liturgjie e fâs memorie de beade **Benvignude Boiani** virgjine; Cividât, 1255 – 1292.

Vinars: **solenitât di ducj i Sants;**

Sabide: **inte memorie di ducj i fedêi defonts.**

***Un auguri di zornadis di interioritât e di famee
In companie dai vîfs, dai sants e dai nestrîs cjârs defonts.***

* * *

* *I salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie lis mans par serviti Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Par domandâ chescj libris scrîvêt a info@glesiefurlane.org*